



Broj: **01/2a-50-3-2-20/12**

01/2-05-1-152/12

Sarajevo: 23. 5. 2012.

ZABILJEŠKA

sa sastanka članova Komisije za vanjske poslove PDPSBiH s novoimenovanim ambasadorima BiH

Sastanak s novoimenovanim ambasadorima BiH održan je 23.5.2012. U ime Komisije za vanjske poslove sastanku su prisustvovali: predsjedavajući Komisije za vanjske poslove Mirza Kušljugić i članovi Komisije Mladen Ivanković Lijanović i Salko Sokolović.

U delegaciji novoimenovanih ambasadora BiH bili su:

1. Jadranka Negodić, novoimenovana ambasadorica BiH u SAD-u (Vašington);
2. Edin Dilberović, novoimenovani ambasador BiH u SR Njemačkoj;
3. Ahmet Halilović, novoimenovani ambasador BiH u Kraljevini Holandiji;
4. Darko Zelenika, novoimenovani ambasador BiH u Kraljevini Jordan;
5. Željko Janjetović, novoimenovani ambasador BiH u Republici Mađarskoj.

Predsjedavajući Komisije **Mirza Kušljugić** je na početku pozdravio novoimenovane ambasadore i predstavio članove Komisije Mladena Ivankovića Lijanovića, Salka Sokolovića i sekretara Komisije Merdžanu Iglicu. Izrazio je zadovoljstvo mogućnošću da čuje njihovo viđenje onoga što ih očekuje u destinacijama u koje idu, te šta misle da bi Parlamentarna skupština BiH i Komisija za vanjske poslove mogli učiniti kako bi im olakšali posao u realizaciji ciljeva koji su pred njih postavljeni.

Jadranka Negodić, novoimenovana ambasadorica BiH u SAD-u, zahvalila se na prijemu i kazala da je donedavno bila ambasador BiH u Velikoj Britaniji te da se priprema za još zahtjevniju dužnost ambasadora u SAD. Dodala je da BiH sa SAD-om ima političke odnose koje treba održavati i dalje razvijati, ali da u ekonomskim odnosima postoji enormni ekonomski disbalans. Istaknula je da će joj koristiti iskustvo koje je stekla obavljajući dužnost ambasadora BiH u Velikoj Britaniji gdje je parlamentarna demokratija razvijena do savršenstva, te da misli da će veliku važnost u predstavljanja zemlje imati informiranost i stoga je izrazila očekivanje da će imati dobru saradnju s Parlamentarnom skupštinom BiH i Komisijom za vanjske poslove.

Edin Dilberović, novoimenovani ambasador BiH u SR Njemačkoj, pozdravio je članove Komisije i kazao da diplomatija postaje sve više multidisciplinarna cjelina, a parlamentarna diplomatija postaje sve značajnija jer je parlamentarcima dozvoljeno da kažu mnogo šta, za razliku od diplomata koji su vezani instrukcijama. U tom kontekstu kazao je da će istrajati na održavanju saradnje s Grupom prijateljstva Bundestaga s BiH koja ima 19 članova i koja okuplja kompletan spektar političkih stranaka, uključujući sve frakcije. Što se tiče ekonomije, kazao je da se o tome može razgovarati te da je o tome imao razgovor s Mirkom Šarovićem, ministrom vanjske trgovine i ekonomskih odnosa BiH. Dodao je da je Njemačka, što se tiče ekonomije, bitna za cijeli region eurozone, a i za globalnu ekonomiju, te da će učiniti sve da još uvijek nedefinirani pojam ekonomske diplomatije kod nas svedemo na normalniji nivo i privučemo što više investitora u BiH. U tom smislu potrebno je iskoristiti Ministarstvo vanjske trgovine i ekonomskih odnosa BiH na pravi način i instalirati naše trgovačke atašee u inozemstvu, dodao je gosp. Dilberović.

Ahmet Halilović, novoimanovani ambasador BiH u Kraljevini Holandiji, kazao je da su naredne aktivnosti koje će Ambasada BiH provoditi u narednom periodu intenziviranje saradnje s novoizabranom Vladom Kraljevine Holandije poslije izbora u septembru, s obzirom da je sadašnja Vlada podnijela ostavku, te promoviranju interesa BiH. Ambasada još planira, a što je usaglašeno u Ministarstvu vanjskih poslova BiH, proširenje obima njenog rada pružanjem konzularnih usluga i organiziranjem građana BiH kojih u Holandiji ima blizu 50.000, koji su dobro situirani i koji su se uklopili u sistem, a koji su do sada bili konzularno pokriveni iz Njemačke i Belgije.

Darko Zelenika, novoimanovani ambasador BiH u Kraljevini Jordan, pozdravio je članove Komisije i izrazio zadovoljstvo činjenicom da ih je primila Komisija za vanjske poslove. Kazao je da odlazi u prijateljsku zemlju s kojom BiH ima odlične političke odnose i nema otvorenih pitanja. Dodao je da će nerezidentno pokrivati Irak, Siriju i Liban a konzularno i Zapadnu obalu koja je pod upravom Palestinske autonomije. Kao svoj cilj naveo je razvijanje bilateralnih odnosa sa svim ovim zemljama s posebnim naglaskom na ekonomsku diplomatiju i jačanje ekonomskih veza. Za Jordan je naveo da je do sada bio oaza mira i stabilnosti u nemirnoj regiji zahvaljujući reformskoj i pragmatičnoj politici kralja, da je donesen set reformskih zakona među kojima je najvažniji zakon o nezavisnoj izbornoj komisiji koja bi trebalo da vodi kompletan demokratski proces u Jordanu. Također je donesen novi zakon o političkim strankama i lokalnim izborima koji bi trebalo da budu održani do kraja godine zajedno s parlamentarnim izborima, dodao je gosp. Zelenika. Istakao je da je parlament dvodomni, gdje gornji dom, senat, imenuje kralj i da glavna opoziciona stranka Muslimanska braća i njihovo političko krilo Islamski akcioni front zahtijevaju da se i senat bira na izborima.

Željko Janjetović, novoimanovani ambasador BiH u Republici Mađarskoj, također se zahvalio Komisiji za vanjske poslove. Kazao je da je prije imenovanja za ambasadora u Mađarskoj bio ambasador BiH u Indiji i Ruskoj Federaciji, a da u Mađarsku treba da ide 20.12. tekuće godine. Dodao je da, pored Mađarske, nerezidentno pokriva Ukrajinu i Moldaviju i da je Mađarska vrlo značajna zemlja za BiH, koja je učesnik svih regionalnih inicijativa i članica Evropske unije. Istakao je da se Mađarska blagonaklono i dobronamjerno odnosi prema BiH u njenim nastojanjima da se približi EU, te da cijeni da u tom kontekstu postoji mnogo prostora da se unaprijede politička i ekonomska saradnja. Što se tiče ekonomske diplomatije, kazao je da je ona vrlo važna, da nivo trgovinske razmjene s Mađarskom nije zadovoljavajući i da pokrivenost uvoza izvozom iznosi 26%, a da su investicije Mađarske u BiH 0,5% od ukupnih investicija u BiH. Naglasio je da je u toku priprema, u kontaktima s mađarskim predstavnicima, iskazana spremnost s njihove strane da se taj nivo saradnje podigne.

Mirza Kušljagić predložio je da se razgovor nastavi tematski o političkom i ekonomskom dijelu. Kazao je da je na upravo završenoj sjednici Komisije bilo govora o daljnjim aktivnostima vezanim za ispunjavanje uslova za MAP, te da su zemlje u koje ambasadori idu izuzetno bitne za to pitanje. Dodao je da članovi Komisije u potpunosti stoje na raspolaganju za sve kontakte, da politički mi imamo neke inicijative vezane za regionalnu saradnju i da bi nam iskustva Višegradske grupe bila jako korisna.

Mladen Ivanković Lijanović pozdravio je novoimenovane ambasadore i poželio im uspjeh u radu. Kazao je da je vanjska politika odraz unutrašnje politike i da smo mi zemlja kojoj je potrebna pomoć, te je stoga uloga ambasadora u tom kontekstu veća.

Mirza Kušljagić kazao je da je tokom nedavne posjete Hrvatskoj bilo govora i razmjene iskustava vezanih za ekonomsku diplomatiju i da Hrvatska po tom pitanju nije daleko odmakla, ali isto tako je zajednički konstatirano da je Srbija po tom pitanju u zadnjih godinu-dvije dana uradila jako mnogo. Stoga bi razmjena praktičnih iskustava u susjedstvu bila jako

korisna, dodao je Kušljugić i naveo da će Ministarstvu vanjskih poslova BiH biti predloženo da se o parlamentarnoj diplomatiji organizira zajednička rasprava.

Edin Dilberović, novoimenovani ambasador BiH u SR Njemačkoj, kazao je da naši biznismeni ne vole ići daleko, osim ako nisu u pitanju poslovi vezani za građevinu, te da se uglavnom baziraju na tržišta koja poznaju i gdje nema jezičkih barijera. Dodao je da se BiH u nedostatku investicija, za što također snosimo odgovornost, može locirati na područja gdje je moguće zaraditi novac i u tom kontekstu kazao da naša zemlja postaje turistički sve atraktivnija.

Mladen Ivanković Lijanović kazao je da nama niko neće dati recept za zaradu novca, te da se moraju ukloniti administrativne barijere koje odvrćaju veliki broj potencijalnih investitora.

Mirza Kušljugić naveo je da Njemačka počinje da se interesira za ovaj region i za Bosnu i Hercegovinu u vezi s energetikom, te da bi bilo dobro da i mi prepoznamo njihov interes pa da ekonomsku diplomatiju usmjeravamo prema tom interesu.

Jadranka Negodić, novoimenovana ambasadorica BiH u SAD-u, kazala je da se ni u jednoj ambasadi ne može zaključiti posao, da ambasada može pomoći pri uspostavljanju kontakata, a da je na privrednicima obje zemlje da li će naći zajednički interes u određenom pitanju. Dodala je da se ekonomija i interesi u svijetu mijenjaju, te da bismo mi trebali pratiti svjetska kretanja i uvidjeti gdje s našim potencijalima možemo imati korist a gdje ne.

Ahmet Halilović, novoimenovani ambasador BiH u Kraljevini Holandiji, kazao je da je Holandija jedna od rijetkih zemalja u EU s kojom BiH ima gotovo izbalansiranu trgovinsku razmjenu. Ono što je važno i na čemu će Ambasada BiH u Holandiji raditi jeste izgradnja platforme na kojoj se mogu razmijeniti iskustava između ljudi, vlasnika malih i srednjih preduzeća, gdje oni mogu razmijeniti i naći svoje interese, dodao je Halilović.

Darko Zelenika, novoimenovani ambasador BiH u Kraljevini Jordan, naveo je da je BiH s Jordanom potpuno uredila sferu bilateralnih ugovora. Osnovni bilateralni sporazumi, kao što je trgovinski sporazum, sporazum o zaštiti i unapređenju investicija, o izbjegavanju dvostrukog oporezivanja, potpisani su i s te strane nema administrativnih prepreka, dodao je Zelenika. Kazao je da je s Irakom, Sirijom i Libanom proces pregovaranja i zaključivanja ovakvih ugovora u toku. Ono što je prepoznato za Jordan jeste da je sektor namjenske industrije označen kao sektor koji ima objektivne šanse da može raditi na jordanskom tržištu, kazao je Zelenika i dodao da na iračkom tržištu postoje objektivne šanse za rad bh. firmi, s obzirom na iskustva koja su bh. firme stekle u Iraku u vrijeme SFRJ, u oblasti građevinskog sektora, inženjeringa, energetike, drvne i prehrambene industrije. Što se tiče Libana, kazao je da je najveći broj turista koji dolazi u Međugorje s tog prostora i da planira da nastavi jačati taj aspekt.

Željko Janjetović, novoimenovani ambasador BiH u Republici Mađarskoj, naveo je da se slaže s Jadrankom Negodić da svaki DKP treba da prepozna šta je u određenoj zemlji predmet interesa i dodao da je ambasada BiH u Indiji od 2002.-2005. godine odigrala veliku ulogu promovirajući potencijale BiH u metalnoj industriji. Kada je u pitanju Mađarska kazao je da bi jedna regionalna inicijativa tu dobro došla s ciljem da se regionalno udružujemo i da tako prodajemo određene proizvode na svjetskim tržištima, jer je Mađarska izrazila takav interes, zaključio je Janjetović.

Mirza Kušljugić se na kraju zahvalio ambasadorima i izrazio očekivanje za dobru saradnju u budućnosti.

SEKRETAR KOMISIJE
Merdžana Iglica

Dostavljeno:

- Komisiji za vanjske poslove PDPSBiH
- Komisiji za vanjsku i trgovinsku politiku, carine, saobraćaj i komunikacije Doma naroda PSBiH
- Ministarstvu vanjskih poslova BiH
- a/a